

四庫全書薈要

• 乾隆御覽本

史部

欽定四庫全書薈要

史部

十國春秋卷八十三

四

詳校官員外郎臣楊世綸



十國春秋卷八十三

檢討吳任臣撰

吳越七



趙國太玄太夫人水丘氏

武肅王莊穆夫人吳氏

昭懿夫人陳氏

文穆王恭穆夫人馬氏

恭懿夫人吳氏

仁惠夫人許氏

忠獻王夫人杜氏

元妃仰氏

忠懿王妃孫氏

附俞氏黃氏

趙國太夫人水丘氏武肅王母也先是英顯王娶于母族故兩世皆為河南水丘氏以武肅王貴初封河南太君進封吳興郡太夫人再封秦國太夫人王事母至孝常遊後庭層樓太夫人春秋高不能上王親負而登焉天復元年九月薨葬于錦南鄉武肅王命吳仁璧作志銘不從殺之事具仁璧傳天寶初梁追封趙國太玄太

夫人

莊穆夫人吳氏安國縣人也父仲忻浙西觀察判官累
贈吏部尚書初武肅王議昏仲忻家咸以王豁達大度
不事產業將不許而夫人世父負知人之鑒固趣成焉
及歸室閨門整肅孝敬盡禮武肅王性嚴急常怡顏以
諫之撫愛諸子有如一體歷封燕晉二國至吳越國正
德夫人夫人常遊奉國寺王命載帛百緡以備散施夫
人曰妾備嘗機杼之勞遽以遊賞靡費非恤民之道遂

不受而罷夫人每歲春必歸衣錦軍以為恒武肅王語之曰陌上花開可緩歸時人用其語以為歌曲至今傳之天寶十二年薨年六十二謚曰莊穆有子十三人又錦南鄉慈智寺西有梁國夫人墳扶風夫人墳韋夫人墳或云皆武肅王夫人也其名號不具見史冊姑為闕

疑云

按文苑英華載莊穆進封晉國制錢珣筆也今不錄

昭懿夫人陳氏文穆王母也清泰初薨贈晉國太夫人謚曰昭懿文穆王性極孝尊禮母黨厚加賜與而未嘗

遷官授以重任故陳姓無有以功名顯者

恭穆夫人馬氏安國縣人父綽雄武軍節度使綽初以舊恩娶武肅王女弟未幾武肅王復為文穆王娶綽女是為夫人夫人性聰慧勤于職武肅王常禁中外畜聲伎而文穆王年逾三十無子夫人為之請武肅王喜曰我家宗祀幸汝得主之矣乃聽文穆王納諸姬郝氏生弘傳弘侔許氏生弘佐吳氏生弘俶眾妾生弘堪弘億弘偓弘仰弘信既長夫人皆均養之常置銀鹿于帳前

坐群兒于上而弄之喜動顏色初封越國加封吳越國
莊睦夫人天福四年薨年五十勅謚曰恭穆葬于衣錦
軍之慶仙鄉良山村

恭懿夫人吳氏名漢月錢塘人父珂官中直指揮使幼
以婉淑侍文穆王忠懿王蓋其所出也恭穆夫人絕憐
愛之夫人善鼓琴性慈惠而節儉頗尚黃老學居常被
道士服惟布練而已每聞王決重刑必顰蹙以仁恕為
言母家或有遷授多峻阻之及入見時加訓勵間以督

責故諸吳終夫人之世不甚驕恣乾祐二年十一月封

吳越國順德太夫人

五代會要曰封贈之制婦人有國邑之號死有謚近梁朝賜張全義

妻儲氏為賢懿夫人又改莊惠蓋當時特恩也

廣順二

年六月薨年四十謚曰恭懿

五代會要云追封故順德太夫人吳氏為恭懿夫人

今從吳越僞史註以恭懿為謚

是秋勅葬于慈雲嶺西原明年忠懿王

建報恩元教寺以資冥福已又鑄銅象二致奉國金地

二尼寺志孝思焉寧國節度使吳延福太夫人弟也建

隆初延福兄弟五人有異圖左右勸王誅之王曰先夫

人同氣安忍寘于法言訖嗚咽流涕但默延福等于外

而不加刑

按西湖志吳廷與請東陽善導和尚舍利建塔于山顙附以佛廬開寶初賜額曰崇壽院

又武林梵志云吳越相吳廷與開寶中建崇壽院內有九級浮圖名應天塔廷與疑即廷福諸弟也

仁惠夫人許氏名新月台州人也雅善音律文穆王後

庭樂部悉命夫人掌焉初魯國夫人生孝獻世子侍御

咸尊禮之有女僧契雲者司香火于麗春院素名能知

人至是謂夫人曰彼廊夫人遠不能及也夫人宜自愛

文穆王襲位勅封吳越國夫人開運二年薨年四十四

謚曰仁惠

文獻王夫人杜氏內牙都監使杜昭達之姑也未幾以病薨

元妃仰氏湖州人父仁詮以牙將事文穆王有功積官至寧國軍節度使天福八年冬忠獻王納為元妃未幾薨葬于國城外之小麥嶺

武林舊事仰妃墓在小麥嶺下

忠懿王妃孫氏名太真錢塘人奉寧節度使承祐之姊也端重敏慧延接姻親及宗屬皆曲盡恩禮好學讀書

通毛詩魯論大義少事忠懿王甚謹一以儉約為訓非
宴會未嘗為盛飾忠懿王征常州妃居國城內時時遣
內侍撫問諸將及從征將帥之家國人稟畏如奉王旨
漢制拜夫人周勃封吳越國賢德夫人宋開寶五年進
封賢德順睦夫人九年王與妃及世子惟濬入覲加封
吳越國王妃令惟濬賫詔賜之宰相言異姓無封妃故
事太祖曰行自我朝表特恩也王獻金幣以謝未幾妃
辭謝中宮錫金器衣著無筭是歲歸國薨墓石人嶺下

明年宋遣程羽來歸王妃之賄謚曰

閔

妃常以一物

施龍興寺形如朽木箸寺僧未之珍也偶出示舶上波斯人曰此日本龍蓋簪遽以萬二千緡易去又有俞氏失其家世封號忠懿王之繼妃也宋太宗時進金銀十餘萬犀二十株通犀賴犀玉帶三十二條水晶佛像十二事其貢獻頗不貲云復有黃妃者常於南屏山雷峰顯嚴院建塔奉藏佛螺髻髮始以百丈十三層為率尋以財力未充姑建七級已又用形家言止存五級名黃

妃塔

淨慈志作黃妃塔
或作王妃塔誤

後以地產黃皮木遂為黃皮

塔俗稱雷峰塔焉塔高四十許丈兀立層霄金碧璀璨

飛甍懸鈴種種嚴飾建塔時以石刻華嚴經鱗甃其下

措法絕類歐陽率更忠懿王有建塔記

吳越國王錢俶
建黃妃塔碑記

曰敬天修德人所當行之矧俶忝嗣丕圖承平茲久雖
未致全盛可不上體祖宗師仰瞿曇氏慈忍力所沾溉
邪凡於萬幾之暇口不輟誦釋氏之書手不停披釋氏
之典者蓋有深旨焉諸宮監尊禮佛螺髻髮猶佛生存
不敢私私宮禁中恭率瑤具創寧堵波於西湖之潝以
奉安之規撫宏麗極所未見極所未聞宮監弘願之始
以千丈十三層為率爰以事力未充姑從七級拌吳初
志未滿為憚計甄灰土木油錢瓦石與夫工藝像設金

碧之巖通絡錢六百萬視會稽之應天塔所謂許玄度
者出沒人間凡三世然後圓滿願心宮監等合力於彈
指頃幻出瑤坊信多寶如來分身應現使之然耳願玄
度有所不逮塔成之日又鎬華嚴諸經圍繞八面真成
不思議劫數大精進幢於是合十指爪以贊嘆之
塔曰黃妃云吳越國王依拜手證書于經之尾

武肅王弟鏐

鐸

楚國公鐸

從弟鎰

鉞

鏐武肅王同父弟也少驍勇善戰天祐初淮南將陶雅
攻婺州命鏐將兵往救無功天寶中吳兵攻蘇州鏐以
杜建徽往援圍得解已而高澧叛湖州鏐以指揮使稟

王命討愷明年武肅王巡湖州署鏐為刺史鏐嗜酒殺人懼王之督已也遂以四年冬殺都監潘長推官鍾德奔吳吳武義初以為右龍武統軍終于其職方鏐出奔時有子二人長者生五年矣次者未周睟武肅王憐之養于宮令與諸子同研席名其長曰可團次曰可圓冀其父得歸聚云

鐸亦武肅王同父弟累官睦州刺史領安南軍節度使同平章事

鐸字輔軒英顯王有五子長武肅王次鐸次鏐次鐸次
即鐸也生而有文在手曰王及長漸滅既生而英顯王
即世武肅王多方鞠育及武肅王薨鐸請服通喪以報
之性多藝善繪畫

國繪寶鑑云
錢鐸善丹青

尤精音律承制累授溫

明二州刺史檢校太尉奏遷恩州防禦使文穆王時除
兩浙行軍司馬拜命之日儀注特甚尋奏改本州團練
使順化軍節度使封楚國公開運二年卒年五十五謚
曰忠簡

鎰武肅王從父弟也積功為龍武統軍田頔叛楊氏武肅王命鎰屯宣州以待變及陳詢叛睦州吳遣陶雅入寇而鎰與顧全武王球實在行間遂為吳人所鹵未幾我軍獲吳將李濤天寶十四年吳乃遣鎰以易濤鎰歸署為鎮海軍節度副使

鉢武肅王從弟也龍紀時淮南六合鎮遏使徐約已得蘇州武肅王命鉢將兵攻之約驅民盡墨鏡其形曰願戰南都從事已而勢寢窘遂與其下泣別入海死鉢由

是拔蘇州未幾州復陷王又遣師平之久之授錄蘇州

招緝使

脩史作
安撫使

頗以戰功稱又衢州刺史鋸睦州刺史

鎮亦武肅王從弟其名時時見于史籍焉

武肅王子寧國公元璣雲國公傳瑛

金華郡王元懿

廣陵郡王元璩

子文奉
文炳

餘姚侯傳曜

子仁俊

大彭侯傳球

扶南侯元球淮陰侯元珣

新安侯傳璫

霅國公傳璟

吳興侯元琳

寧明王元瓚

元弼

元璣武肅王第二子也母慶安夫人胡氏元璣性氣寬厚沉靜寡言多尚儒釋不喜奢侈過歷中外所在黎庶安之累官寧國軍節度使同平章事檢校太傅封宛陵侯晉封寧國公長興四年十二月卒元璣早喪妻終不繼娶無嗣

傳瑛武肅王第三子

一曰長子

母莊穆夫人吳氏原名傳錯

未幾易鉅為瑛天性英敏頗敦儒學聚書數千卷善騎射工草隸徐許之叛與三城都指揮使閉門拒寇有功時城中有錦工二百餘人皆潤人也傳瑛慮其為變乃詐傳王令百工悉免今日工作遂發懸門放之出王聞其事嘉之尋授兩浙副大使天祐三年九月唐哀帝選傳瑛尚壽昌公主勅武肅王曰金章貴第方膺下嫁之榮齊家大邦始稱和鳴之兆先帝與卿素同盟約誓掃寇讐雖崇資厚祿酬勲已極於當時而懿戚周親結分

思睽於奕世尋期愛女欲配高門三邊未息於戎機百
兩遂稽於宿諾願遵先旨特舉令儀况傳瑛驪頷奇光
鳳毛異彩不俟折筭之訓已當壓鈕之祥媯汭名門雅
稱大姬之匹張敖顯族宜承元女之姻是用先降徽章
特加異數今授傳瑛大同軍節度使檢校太傅同中書
門下平章事駙馬都尉兼加食邑八百戶公主未及降
而卒

脩史作開平三年梁選王子兩
浙副使傳瑛為駙馬都尉似誤

傳瑛夢與公主語

因得鬼疾久之將兵攻常州無功無何卒年三十六贈

太尉

一作太師

封雲國公

元懿字秉徽初名傳璫已又名傳懿後更今名武肅王第五子也生而燕頤起家鎮海軍右直都知兵馬使尋授安國衣錦軍防遏指揮使陞檢校兵部尚書元懿性至孝母李氏

一作金氏

常侍武肅王不稱旨被捶成疾疾動

每經旬月元懿躬親廁牕稱藥量水夜不解帶者久之常出治睦州民間一夕輒數驚火起巫楊韞者陽為刻期曰某日某所復當火已而皆如其言元懿曰火如巫

言巫為火也命斬韞于市火遂絕天寶中自睦州判東陽東陽之南有神曰白砂神邑人多畏奉之歲三月必大作風雨由白砂過州城壞民廬舍無算相傳神故龍也每歲一復東海為恠至是元懿臨其境夢朱衣來言白砂王慮震驚相國已由南山而去人咸異之元懿頗喜遊宴彫飾之事文穆王襲位禮敬尤篤元懿飲酒恒及半而傾于地王因宴致鈔鑼于元懿前諷之元懿悔悟遂稍稍改云累官賓睦二州刺史清海武勝等軍節

度使太傅同中書門下平章事進太師中書令封金華
郡王廣順元年薨于婺州年六十有六謚曰宣惠墓在
金華縣東北六里元懿治郡三十年初蒞新定時有卜
士方氏者時人號曰龜精常以卜數貽之曰太乙接天
河金華寶貝多郡侯六十六別處不經過至是其言果
驗子仁侂官婺州刺史武勝軍節度使

元璟字德輝武肅王第六子也

一曰第
四子

初名傳璟儀狀

瑰傑風神俊邁起家沂王府咨議參軍宣武節度判官

累遷散騎常侍賜金紫尋屬軍旅事乃改馬軍廳事指
揮使武勇都之變徐綰召淮南兵入寇顧全武謂楊公
大丈夫今以難告必問我群公子誰可行者武肅王曰
吾常欲以傳璚昏楊氏今其時矣乃遣傳璚微服為全
武僕詣廣陵比及望亭有逆旅媼輒識之至潤州團練
使安仁義亦知其非常或云愛其清麗將以其下十人相易全
武賂閭吏宵遁乃得脫已而見吳王行密傳璚指陳逆
順之理吳王為之動容嘆曰此龍種也生子當如錢郎

吾子真狔犬耳遂以女妻之即日召田頔還君未幾逆婦歸錢塘累征緡雲睦州皆陷陣有功授邵州刺史復征湖州高澧及攻東洲授睦州刺史尋遷蘇州累勅授中吳建武等軍節度使蘇常潤等州團練使太傅同中書門下平章事文穆王立更初名諸兄弟盡易傳為元而傳璩亦以元璩名元璩在蘇州三十年性儉約而恭靖便弓馬文穆王時以王兄尤加禮遇初璩自姑蘇入覲王以家人禮事元璩親奉觴為壽曰此兄位而小子

居之兄之賜也元璚俯伏曰大王功德高茂先王擇賢而立至公也君臣位定惟知恭順而已因相顧感泣進檢校太師中書令開府儀同三司作金谷園以娛老又建烟雨樓于滌湖之上久之晉勅封廣陵郡王封不及受命而薨宣旨于柩前時天福七年三月也年五十六葬以王禮謚曰宣義子文奉文炳

文奉字庶卿廣陵王第二子精騎射能上馬運槊涉獵經史音律園緯醫藥鞠擊皆冠絕一時以廕為中吳軍

牙內都指揮使改節度副使幾三十年天福中嗣元璿
為節度使累加至檢校太尉兼中書令文奉于郡中建
南園東莊

九國志謂
之東墅

為吳中之勝奇卉異木及其身見

皆成合抱又累土為山亦成岩谷延接兵旅任其所適
自號曰知常子飲酒兼數人時時乘白驪披鶴氅緩步
花徑或汎舟池中遠近聞賓客笑語聲則就飲為樂所
聚圖籍古器無筭雅有鑒裁一時名士多依之而禪流
法齊輩亦藉以取給焉時有丁陳范謝四人

丁守節陳
贊明范夢

齡謝
崇禮

皆廣陵王客也文奉署為節度推官先是元璩夢

登烏鵲橋見禽獸充牣旁人云此二郎祿料也又文奉
常叩祿命于天台僧德韶德韶云明公已巳八十一至
開寶二年己巳歲八月十一日卒其言始驗謚曰威

文炳廣陵王第開子也開寶初文炳嘗募妻丘于報恩
寺側發古墓得丈夫遺骸長丈許東列銅鐺西有寶劍
玉環文炳方取劍會黑蜂遽螫之暴卒子知玄號擗昏
眩久之始蘇自言丈夫稱是帝堯之臣繇余氏佐禹治

水以功封吳獲葬于茲若父奈何發吾版石奪吾玉槨
今雖擊死方隸吾籍其勿悼念好事者比于貳負之臣
之尸多傳其事焉

傳瓘武肅王第八子母濟南夫人童氏傳瓘性仁厚明
敏好學治郡大得政體累授鎮東軍親巡都指揮土客
諸軍安撫使光祿大夫賓州刺史進金吾衛大將軍員
外置同正員檢校司空改明州刺史封餘姚侯寶大元
年卒年三十傳瓘在東府時酷好植牡丹成叢列樹者

顏色葩芳率皆絕異人號為花精

海錄碎事又云忠懿王從兄仁傑酷好種

花人號為花精未詳是非

子仁俊

仁俊警敏有智畧文穆王繼立諸將多恃強詣府請誅
劉仁杞等王命仁俊宣教音詞弘亮意旨曉暢諸將皆
懾服去王以為仁俊能大奇之及元球元珣獲罪于王
王欲按將吏與交通者株連未已仁俊諫曰昔光武克
王郎曹公破袁紹皆焚其書疏以安反側今宜效之由
是中外得以帖然忠獻王時仁俊為內外馬步都統軍

使而仁俊母故杜昭達之姑也富人程昭悅者以私憾誣闕璫與昭達謀奉仁俊為亂王于是殺璫昭達而奪仁俊官幽之東府昭悅復收仁俊故吏慎溫其使證仁俊之罪每上彭時五毒條至溫其堅守不屈王嘉溫其節擢為顯職未幾昭悅伏誅釋仁俊之囚廣順元年忠懿王以仁俊無罪復其官爵歷仕威武軍節度使檢校太保卒謚安簡

傳球武肅王子也當武勇都之變傳球年尚幼淮南將

田頔徵質子于我王欲遣以行傳球不可王怒將殺之
及事平王奪其內牙兵印後封大彭縣侯

扶南侯元球淮陰侯元珣皆武肅王子也元珣以順化

節度使同平章事判明州

按舊五代史長興三年昇楚州為順化軍以明州刺史錢

元珣為本州節度使楚州時屬揚州元珣蓋鎮明州而領楚州節也

驕恣不法文穆王廢

為庶人幽之別室而元球為武肅王愛子數有軍功且

賜以兵仗累官土客馬步都指揮使靜江節度使兼中

書令文穆王時恃恩驕橫增益軍馬頗不平于王王使

人諷元球請輸還兵仗出判溫州元球未之許也于是
銅官廟吏承王指密告元休遣親信禱神求為吳越主
又為蠟書從水竇出入與元珣謀議圖危社稷文穆王
遂馳騎召元球宴宮中至則左右陽稱元球有刃墜于
懷謀為不測即格殺之并殺元珣

按晉高祖實錄十國
紀年作元球元珣以

罪誅今從吳越備
史九國志作元球

傳璠

一作璠

武肅王第十四子也起家鎮海節度右押牙

充上直都知兵馬使檢校尚書左僕射已而出為湖州

刺史進太傅封新安侯天寶十四年娶楚武穆王女馬氏未幾傳璚死馬氏奮不欲生天福中南漢主命侍郎盧膺偕楚使歐陽練來逆馬氏為繼室蓋漢主后故馬氏女兄也至是欲續舊姻楚文昭王實內主之馬氏涕泗迸至誓不再適遂終其身于吳越

傳璟武肅王第十五子初授湖州刺史唐天祐四年哀帝選為駙馬勅武肅王曰卿功高鼎鉉爵極土茅光紀年繫月之書等巢閣負圖之瑞朕自惟寡薄猥荷基局

惟於舊勲敢墜先志所以再謀選尚用洽姻親男傳璟
學禮聞詩資忠履孝前代則何郎風貌克著嘉名近朝
則郭令功崇爰推愛子既臻具美須降明恩俾升右揆
之榮兼正九卿之秩奉車增貴鳴玉趨朝騁騏驥之修
途契鳳凰之吉兆眷戀之外慰沃良深今授傳璟檢校
尚書右僕射守司農卿駙馬都尉傳璟後封雲國公
元琳武肅王第二十三子歷官右千牛衛大將軍

今慈溪錢

氏其苗裔也

元瓚武肅王第二十八子少強直好詩學武及長從征
有功歷官至知福州彰武軍事號令嚴明麾下無有敢
犯者元瓚處兄弟不疑侍文穆及忠懿諸王皆盡臣禮
由是上下卒用和睦建隆六年卒年六十有七追封寧
明王

元弼亦武肅王子也文穆王初置秀州以元弼為刺史
元弼蒞政有方用最課名一時武肅王親子三十八人
見于史傳者文穆王暨元璣諸王子外又有永嘉侯傳

璵金華侯傳琇錢塘侯傳琰而失其封爵者則有駙馬
都尉傳珣靜海軍節度使元祐及元璉元玠元珣元璞
元璫元珣元璫元璫元裕元璫元璫元璫元璫凡得三
十三人而寶正長興時又有温州刺史元祁元珣未詳

其所出云

按陶九成輟耕錄云吾鄉錢叔璫贊乃武肅王諸孫也常示所藏鐵券形宛如瓦高尺餘

潤二尺許券辭黃金商嵌一角有斧痕蓋至元丙子天兵南兵其家竊負而逃死于難券亦莫知所在越再兩子漁者網得之乃在黃岩州澤庫深水內漁意寶物試斧擊之則鐵焉有報子叔璫兄者用十斛穀易得又七修類藁云明太祖下禮官議鐵券之制有袁唐和陵時賜錢鏐者其孫尚藏因取為式武肅之裔在台州者未

審幾族姑
附錄于此

文穆王子孝獻世子弘傳

瓊山侯弘僕

弘儼

吳興郡王弘湛

弘億

彭城侯弘儀

弘偃

弘作

儼

孝獻世子弘傳文穆王第五子也與忠遜王同出魯國
夫人郗氏初梁沙門寶誌銅碑記云有真人在冀州開

口張弓左右邊子子孫孫萬萬年自從南唐以弘冀名

子而文穆王諸子皆連弘字以應之弘傳所由名也王

年四十冢嗣未建及弘傳生特為鍾愛累奏授兩浙副

大使果州團練使檢校太尉國建立為世子先是王治

世子府謠言曰何處有鹿脯及將歿又有人題所居屏

障曰四月二十九日大會群仙凡署字數處天福五年

果以病薨年十六歲追謚曰孝獻葬錢塘天竺之前山

楓林旋改世子府為瑤臺院九國志太平興國中宋以錢俾為慎瑞師三州觀察

使蓋俾常為僧復好睡故戲之也疑俾亦文穆王諸子

弘僕文穆王長子歷任靜海軍節度使温州刺史封瓊
山侯卒文穆王子十四人弘僕以下次弘僊次弘侑次
弘佖次孝獻世子次忠獻王次忠遜王次弘僊次忠懿
王次弘億次弘儀次弘偃次弘仰次儼即弘信而弘侑則
又其養子也

弘僊字智仁文穆王第二子本名弘偁性喜簡儉善騎
射能書有文而自晦筮仕上直副兵馬使檢校尚書右

僕射年二十餘遷東府安撫使洞曉政術吏不敢欺文
穆王嘉之賜金酒器一副因命兼領睦州時福州初歸
附將校有讐隙者率多相誣弘僊謂左右曰人各有憾
誣構一啟疑懼交至豈國家推心懷遠之道邪悉置不
問尋為靜海軍節度使判軍州事均徭役罷淫祀盡放
所畜聲伎每食不過鮑魚菰菜顯德中常入覲西府永
嘉人謂其將代也卧轍阻之弘僊先以籃輿載侍妾出
衆疑弘僊在中遽擁而迴其為民所感悅如此久之改

彰武軍節度使知福州事溫人皆行啼巷哭曰願公早

回亦有携家以從者謂之隨使百姓

亦曰隨使戶

承制累授

太尉拜丞相乾德四年卒于閩神柩經溫州歸會稽三

州之民為號踊者甚衆終年五十有四謚節惠弘儼有

弟弘

闕

文穆王第三子也封西安侯居衣錦軍者多其

後

又弘按官至秀州刺史工于畫執或言亦文穆王養子云見圖繪寶鑑

弘僖字惠達文穆王第八子也母陳氏起家內牙諸軍

都知兵馬使檢校司空年十八出為湖州刺史有妖巫

登衙門大樹恣為鬼神語州人驚畏弘堪曰妖由人興
命注弩而射巫果乞命因扶之百投于境外一州大服
弘堪明吏術能為詩頗有奇句忠懿王嗣位恭敬尤篤
顯德間工城灾悉以器用服玩上之累奏授特進檢校
太尉宣德軍節度使封吳興郡王建隆初宋勅授同中
書門下平章事尋以飲酒過度薨年三十八謚曰恭義
忠懿王哭之慟撫弘堪諸子恩禮有加先是大星隕于
西北月餘而弘堪逝焉

弘億字延世文穆王第十子母沈氏初孕文穆王夢僧
入寢帳已而生弘億故小字曰和尚天資俊拔善屬文
年二十官內牙諸軍左右都虞候檢校左僕射開運間
興師救福州忠獻王欲鑄鐵錢以益將士祿弘億諫曰
鑄錢有八害新錢既行舊錢皆流入鄰國一也可用於
吾國而不可用于他國則商賈不行百貨不通二也銅
禁至嚴民猶盜鑄況家有鐺斧野有鑄犂犯法必多三
也閩人鑄鐵錢而亂亡不足為法四也國用幸豐自示

空乏五也祿賜有常無故益之以啟無厭之心六也法
變而弊不可遽復七也錢者國姓易之不祥八也王善
其言而止未幾為忠懿王丞相會內牙指揮使錢滔謀
亂辭連弘億左右勸王窮其事王以弘億故不欲顯治
貶滔處州而出弘億為明州刺史弘億居明州頗著善
政凡一切科率舊制悉除之顯德中王命括民丁以益
軍旅州縣長吏因之多所殘刻弘億手疏其弊辭理切
直王感悟乃罷王常與丞相以下論民之勞逸都由人

君奢儉裁詩二章以寓志弘億亦謂北方侯伯多貢淫
巧蠱君心因獻詩風刺王嘉歎久之仍賜詩褒美弘億
女故常字王舅吳氏子者也已而諸吳驕縱日甚弘億
遂絕不與通人咸稱其強正焉建隆初升奉國軍節度
使檢校太保以名犯宋宣祖諱改名億末年夢金甲神
告其死期因署壁曰奉國節度使只年三十九大會賓
客飲酒與之訣卧疾三日而終謚曰康獻

順存錄杭州
志俱作忠獻

弘儀文穆王第十一子建隆初避宋諱改名儀起家鎮

東軍安撫使乾德時奏授越州觀察使歲旱租不登儀
以私財八百代賦越民無不德之故再任幾三十年所
深信內典在越多營佛事與雲門僧重曜交相得宋太
宗即位加金紫光祿大夫檢校太保封開國彭城侯忠
懿王入朝儀自東府至太宗詔改慎瑞師三州觀察使
已又改金州觀察使太平興國四年卒于京師之賜第
年四十八贈安化軍節度使葬京城東之臨汴鄉邊公
原儀工草書善奕碁皆及上品曉音律能造新聲尤工

琵琶妙絕當世忠懿王常宴集兄弟欲使儀彈而難于
面命乃別設一榻置七寶琵琶于上覆以黃錦酒酣儀
果白王曰此非忽雷乎願奏一曲為王壽時王叔元璫
亦知音王命之拍曲終王大悅賜儀北綾五千段元璫
錢千緡當時以為美談儀終之歲重曜夢儀被天人服
乘雲而至曰弟子已生天矣重曜寤貽書具述其夢且
云觀公之操履雅叶斯兆然世祿無幾願益進修函未
達而儀已逝焉後十年墓為盜所發貌如生人故吏吳

玄素昇柩還越莫于秦望山重曜之塔側妻何氏累封
廬江夫人

弘偓字贊堯文穆王第十二子也性仁孝事母陳氏以
恭勤聞及任衢州刺史為政寬恕厚重民多愛之時屬
歲旱部民將逐食他州不忍輒去共詣聽事告白而行
弘偓為之流涕忠懿王立友愛甚至顯德五年卒中外
無不歎惜終年二十五子昭度字九齡仕至供奉官俊
敏工為詩多警句有集十卷行于世

弘仰文穆王第十三子母周氏弘仰善騎射通儒術尤精書法累官台州刺史性雖嚴急而政事寬簡吏民畏服顯德五年二月卒年二十有四謚曰成顯子昭序字著明好學喜聚書多親寫入宋知通利軍以勤幹聞

儼字誠允文穆王第十四子忠懿王異母弟也本名弘信後又去弘名信宋淳化初改今名焉儼生之夕母崔夫人合瞑時見一僧坐帳前既寤彷彿如覩乃生儼文穆王喜命鑄金銀大錢為洗兒具甫及周昉府中籤鑰

字一見即能記憶文穆王大漸時儼在別院忽驚啼謂
食母曰適夢白髮翁呼我速詣王所因大號泣言未卒
而訃聞矣儼幼年為沙門及長謹慎好學雖祈寒溽暑
未嘗暫輟圖籍忠懿王襲國命領鎮東軍安撫副使顯
德四年奏署衢州刺史已又知婺州武勝軍事晉光祿
大夫封開國伯宋太祖平揚州遣儼入賀太祖命閤門
副使武懷節賁詔迎勞及歸賜玉帶名馬錦綵器皿開
寶三年代兄偕知湖州充宣德軍安撫使忠懿王攻常

州命儼督漕運太平興國二年隨忠懿王朝宋侍祠郊
宮詔儼班列于節鎮下太宗常幸天駟監賜從臣馬勅
主者曰錢儼儒者宜擇馴馬給之累授新媯儒州觀察
使仍知湖州又為隨州觀察使頃之代兄儀為金州觀
察使出判和州真宗嗣位加檢校太傅累階至特進在
職十七年咸平六年卒年六十七贈昭化軍節度使謚
曰靜宣葬和州子昭慈亦有文名儼博涉多聞少夢人
遺以大硯自是文辭敏達富贍當時國內文章向推羅

隱崔仁冀而儼能與之頡頏太宗朝常獻皇猷錄咸平
時又獻光聖錄所著有前集五十卷後集二十四卷吳
越脩史遺事忠獻王勲業志錢氏戊申英政錄若干卷
又作貴溪叟自序傳一卷善飲酒百卮不醉居外郡常
患無敵或言一軍校差可倫擬儼問其狀曰飲益多手
益恭儼曰此亦變常非善飲也儼鎮湖州時後園芙蓉
枝上穿黃玉玦一枚枝梢交雜不知從何而貫儼截幹
取玦以獻人謂真仙來遊留此以驚世者亦異事云

忠獻王子富水侯昱

西平侯郁

忠遜王子昆

易

忠懿王子世子惟濬

彭城郡王惟治

英國公惟演

惟濟

昱字就之忠獻王長子也忠獻王薨昱在襁褓間國人立忠遜王遂以昱為咸寧大安二宮使忠懿王嗣位承制授秀州刺史宋太祖御極昱入貢與江南使同侍宴射于後苑江南使先中的令昱解之應弦而中賜以玉

帶

錢氏家乘云太祖命太宗于中南府置宴習射後苑太宗中的昱亦中的太宗解玉帶賜之今從宋史

及宋平蜀昱復入賀歸為台州刺史領德化軍節度使

唐僖宗光啟三年升台州為德化軍

本路安撫使俄領靜海軍節度使溫

州刺史轉彰武軍節度使宋師討江南昱為東面水陸

行營應援使從忠懿王朝宋授白州刺史昱上太平興

國錄一卷求換臺省官太宗賞其才詔學士院試麻制

三篇荅高麗書一道除秘書監判尚書都省時新葺省

署昱撰記奏御又常以鍾王墨迹八卷為獻有詔褒美

又聞昱善書令進筆札賜御書金花扇二急就章一御
翰三十軸出知宋州改工部侍郎歷典壽泗宿三州率
無善政至道中郊祀當進秩太宗曰昱貴家子不宜任
丞郎進鄆州團練使咸平二年表入朝以病不及陛見
卒年五十七贈太師封富水侯莫開封府汴陽鄉昱與
從父儼皆以文章知名中朝比之二陸又雅善琴畫聰
明能覆碁飲酒至斗餘不亂尤好學喜聚書多所吟咏
恒與中朝卿大夫唱酬一日對沙門贊寧隸竹事迭錄

所記昱得百餘條因集為竹譜三卷生平交舊昱終日
談宴未嘗犯家諱有貳卿文稿二十卷末年貪猥縱肆
無名節可稱子百人涉登雍熙進士第絳至內殿承制
累典郡頗以幹力稱

郁忠獻王第二子累官鎮東軍節度副使秀州刺史入
宋改知全州至太保卒追封西平侯忠獻王群從中又
有仁熙者頗讀書能丹青尤工水牛多寫于紈扇上錢
氏子弟俱擅文采逸興豪舉常取雪上爪各言子之的

數言定剖視負者張宴謂之爪戰至今傳為雅謔

昆字裕之忠遜王子也歸宋登進士第累遷至三司度
支判官歷知七州治尚寬簡以秘書監致仕卒年七十
六昆善為詩賦又工草隸有文集十卷性嗜鱗常求補
外職曰但得有鱗無通判處足慰素願也

昆又工畫常
繪寒蘆沙鳥

于國扇人
籠寶之

易字希白忠遜王子忠懿王入宋群從悉補官易與兄
昆不見錄遂刻志讀書年十七舉進士試崇政殿三篇

日未中而就言者惡其輕俊罷之再舉進士府試第二
自謂當第一乃上書言試朽索之馭六馬賦意涉譏諷
真宗降為第二補濠州團練推官改光祿寺丞時惟演
叅台席實易為草制朝廷以為美談未幾擢知制誥判
登聞鼓院卒年五十九易才學敏贍數千百言援筆立
就又善尋尺大書行草善觀佛書檢道藏有金閨瀛州
西垣制集一百五十卷青雲總錄青雲新錄南部新書
洞微志一百三十卷

世子惟濬字禹川忠懿王嫡子也顯德二年惟濬生即稱世子表授鎮海鎮東兩軍節度副大使檢校太保鈐轄兩浙管内土客諸軍事建隆七年加檢校太傅三年領建武軍節度使乾德初加檢校太尉是年冬朝宋六年復朝宋侍郊祀開寶二年充鎮東等軍節度浙江東西道觀察處置兩浙制置營田發運等使未幾朝京師宋太祖召宴苑中令黃門奏蕭韶樂與諸王同席坐賜玉帶珠綴衣水精勒御馬四年又朝宋寵待有加宋兵

征江南惟濬從忠懿王下常州以功加同平章事太宗
即位加兼侍中太平興國二年丁母妃憂起復加鎮東
大將軍右金吾衛大將軍員外置同正忠懿王將入朝
惟濬先貢方物太宗召戶部郎中侯涉至泗州迎勞之
三年忠懿王獻地改封惟濬亦徙淮南節度使用郊祀
恩加檢校太師從平太原征幽薊已又隨幸大名雍熙
中歷鎮安州端拱初宋太宗藉田封蕭國公忠懿王薨
起復加兼中書令惟濬與諸王子共進上綾羅犀玉帶

笏犀角象牙丁香馬腦鞍勒金玉珠翠首飾器皿凡數

十萬計又進女樂十人太宗不納各賜錦綵三十段遣

還淳化初杭州上武肅諸王唐梁以來累朝所賜玉冊

竹冊各三副鐵券一詔誥百餘函太宗詔還惟濬未幾

暴卒年三十七追封邠王

脩史表作祁王

謚曰安僖葬汴京之

南惟濬輕財好予頗酒于酒故不享遐年焉子守吉守

讓守吉官宋西京作坊使守讓字希仲累任至宋東染院

使頗勤學有文集二十卷子恕娶曹王元偁女長安縣主

惟治字世和本忠遜王長子忠遜王初遷于東府而
惟治生忠懿王酷愛之養為己子幼好讀書八歲授
兩浙牙內諸軍指揮使判軍糧營田事又改德化軍使
遷檢校太保台州團練使乾德四年宋制授寧遠軍節
度使檢校太尉仍兼牙職與世子惟濬節旄同日至國
人榮之宋師伐江南惟治從忠懿王帥兵下常州策勲
改奉國軍節度使忠懿王朝宋命惟治推發遣軍國事
王還令惟治入貢惟治私獻塗金銀香獅子香鹿鳳鶴

孔雀寶裝髹合釳金甕器萬事吳繚綾千匹辭日宋太祖賜襲衣玉帶塗金鞍勒馬金銀器繒綵踰萬計太宗嗣位進檢校太尉忠懿王再入覲又權國事會殿中火惟治率兵臨高下視令親信十數輩仗劍申令敢後顧者斬頃之火息妻族有隸帳下者恃親犯法命杖背于府門王既納土宋命考功郎中范旻知杭州惟治奉兵民圖籍帑廩管籥授旻與其弟惟渲惟灝歸宋改領鎮國軍節度使惟治草隸擅絕尤好二王書每曰心能御

手手能御筆則法在其中矣常以鍾繇王羲之唐玄宗
墨跡凡七軸裝潢為獻太宗常與翰林賀正顯評惟治
書曰諸錢皆效浙僧亞棲之蹟故筆無骨獨惟治工耳
雍熙三年太宗大舉征幽州命惟治知真定府兼兵馬
都部署前一日曲宴內殿惟治獻詩太宗覽之悅酒半
遣小黃門密諭北面之寄至則訓兵享士頗勤政務初
惟濬雖忠懿王嫡嗣然以其放蕩無檢故王雅器惟治
一夕忠懿王暴疾王妃悉飲符鑰付之及王薨起復檢

校太師累上表請罷節鎮不許後坐心病家事不肅而
僮奴以姦私殺人于廷真宗為停按鞫止貶右監門衛
上將軍晚年資用頗竭真宗憐其貧特轉右武衛上將
軍月給奉十萬累加左驍衛上將軍左神武統軍卒年
六十六贈太師追封彭城郡王葬洛縣邙山先王之塋
惟治好學家聚法帖圖書萬餘卷多異本生平慕皮陸
為詩有集十卷又有寶子垂綬連環詩

廻文詩也寶子即香爐

世

多稱之書跡恒為人藏弃娶祁國夫人元氏再娶瑯琊

郡夫人水丘氏子丕幼篤學仕宋終光祿少卿惟治初
鎮明州夢神人披甲謂曰我西嶽神公面有缺文即捧
土填之後遂領華州節鉞二十年

惟演字希聖忠懿王次子歸宋歷右神武將軍博學能
文召試學士院以笏起草立就真宗稱善歷翰林學士
工部侍郎樞密副使會靈觀使兼太子賓客更領祥源
觀晉秩工部尚書仁宗立進兵部尚書未幾以太后姻
家罷為保大軍節度使知河陽踰年請入朝加中書門

下同平章事判許州冀朝廷復用留滯京師為臺臣奏
劾乃亟去天聖初改武勝軍節度使明年來朝上言先
壠在洛陽願守宮鑰即以判河南府再改泰寧軍節度
使惟演雅意柄用抑鬱不得志及仁宗耕籍田求侍祠
因留為景靈宮使太后崩落平章事為崇信軍節度使
居無何特贈侍中追封英國公太常張瓌請謚文墨已
乃改文僖其本末多詳宋史茲不具錄惟演文辭清麗
名與楊億劉筠相上下於書無所不讀家儲文籍侔秘

府尤喜獎厲後進所著典懿集三十卷又著金坡遺事
飛白書叙錄達辰錄奉藩書事若干卷常曰吾平生不
足者惟不得于黃紙上押字爾蓋未常歷中書也子暖
晦暄從弟易易子彥遠明逸父子兄弟相繼以制策登
科為錢氏一時之盛

惟濟字巖夫忠懿王第六子

錢氏家乘
云第八子

生七歲王徙封

漢南奏補本府元從指揮使歷諸衛將軍領恩州刺史
改東染院使真拜封州刺史嗣後請試郡宋真宗命知

絳州民有植條桑者盜奪桑不能得乃自創其臂誣桑主欲殺人久繫不能辨惟濟取盜與之食視之盜以左手舉匕箸惟濟曰以右手創人者上重下輕今汝創特下重正用左手傷右臂非爾自為之邪盜乃服誣妄罪未幾遷永州團練使改知成德軍仁宗時加檢校司空民有偽作白金質取緡錢者其家來告惟濟曰第奪言被盜示以重購質者當來責餘直即得之矣已而果然杖死之改吉州防禦使除虔州觀察使旋知定州升武

昌軍節度觀察留後惟濟喜賓客豐宴犒家無餘貲所
負公使錢至七百餘萬卒贈平江軍節度使謚曰宣惠
賜賻錢三百萬絹千匹所著有玉季集二十卷惟濟多
吏才而性苛忍所至牽蔓滿獄重囚棄市或至斷手足
探肝膽以為常知定州時有婦人待前妻子不仁至燒
銅錢灼臂惟濟命取所生兒置雪中械婦人往視兒死
其慘毒多此類忠獻忠懿二王親從子凡六十八人今
見傳記者不過十餘人他不可得而詳也

安國縣法華
院有僧賜號

普照大師傳為錢王第十
九子疑即忠懿王子云

十國春秋卷八十三

十國春秋卷八十四

檢討吳任臣撰

吳越八

列傳

羅隱

羅隱字昭諫新城人也後改新城為新登亦為新登縣人祖知微唐福唐縣令父修古應開元禮隱本名橫貌寢陋凡十上不中第遂更今名少能詩與族人虬鄴齊

稱時人謂之三羅初寓池州梅根浦刺史竇滄營墅居之因自號江東生尋為唐相鄭畋李蔚所知卧病長安會天旱詔大京兆祈雨作法隱上疏切諫詞涉規諷竟

不用

疏畧曰夏五月京畿旱癸巳日聞詔大京兆用器水壚香蒲蕭絳幡輦致于坊市門將所以用舊法

而召雨也臣聞水旱與天地同出苟時或然不可以倉卒除去今秦地旱已逾月矣而陛下禱祠亦以頻矣天之高地之厚五穀之綿亘四瀆之宏遠陛下命百執事啟其外何嘗不以心祝之雖莖擣苗乾而百姓不忍嗟者其感陛下之誠深也今以蒲蕭輦為請者豈陛下以其靈于嶽瀆者乎夫嶽瀆視陛下之公輔裂陛下之土田苟陛下憂則嶽瀆亦宜憂矣受祭據封者尚未能為陛下出力彼蒲蕭復何足以動天臣為陛下不取也

已而遇羅尊者以相術勸隱曰君志在一第官不過簿尉耳若能罷舉東歸霸國富貴必矣隱由是從事湖南歷淮潤諸鎮復多齟齬不合

隱與顧雲等謁淮南高駢見駢酷好仙術潛題后

土廟刺之連夕挂帆而返巫者告駢駢怒發急棹追之不及後駢遇害隱著妖亂志以非之

是時招

討使宋威征賊不時進隱詣軍門上書言王仙芝尚君長等凌突我廬壽煇剝我梁宋天子因處分十二州取將軍為節度非方鎮之無帥非朝廷之乏主蓋以將軍跳出隴右不二十餘年三擁節旄謂將軍必能知恩用

命耳今聞群盜已拔睢陽二城大梁亦板築自固彼望將軍猶沸之待沃壓之待起也而將軍朱輪大旆優游東道不知朝廷以八十三州奉將軍侍衛者乎抑將俾將軍旦夕剪此草寇也威得書甚病其言久之歸杭州謁武肅王懼王不納乃以所為夏口詩標卷首

中有一箇稱衛

容不得思量黃祖漫英雄句

王覽詩大笑加殊遇貽以書曰仲宣遠

託劉荊州都緣亂世夫子辟為魯司寇只為故鄉隱曰是不可去矣武肅王初授鎮海節度使令沈崧草謝表

盛言浙西繁富成以示隱隱曰今浙西兵火之餘日不暇給朝廷執政方切于賄賂此表入奏執政豈無意要求邪廼請更其畧曰天寒而麋鹿常遊日暮而牛羊不下朝廷見之曰必羅隱辭也及昭宗易名曄隱為賀表云左則虞舜之全文右則姬昌之半字京師稱為第一梁既篡唐欲以虛爵縻強藩進武肅王吳越兩國且以諫議大夫召隱隱不行請舉兵討梁曰王唐臣義當稱戈北嚮縱無成功猶可退保抗越自為東帝奈何交臂

事賊為終古羞乎王始以隱不遇于唐有舛望心及聞其言雖不能用而心竊義之王待隱日隆時西湖日納魚數斤號使宅魚會王名隱題磻溪垂釣圖隱借詩寓意遽竭其征

詩曰呂望當年展廟謨直鉤釣國吏何如若教生在西湖上也是須供使宅魚又

一日寢疾王親臨撫問因題詩于壁

詩云黃河信有澄清日後代應難繼

此隱為續末二句幕紅紗于上以誌恩遇焉隱性不喜

軍旅而料事多中初武肅王城西府命賓寮巡覽顧謂左右曰百步一敵樓足言金湯之固隱徐曰敵樓不若

內向為佳及武勇都之變援兵多自外攻內人皆以為

先見

世傳隱出語成讖閩中書簡灘玉髻峯皆留異迹而黃滔贈隱詩亦云三微不起時賢識九轉丹成

道者累官錢塘縣令授鎮海軍掌書記節度判官鹽鐵

發運副使除著作佐郎司勳郎中歷遷諫議大夫給事

中發運使賜金紫天寶三年十一月卒年七十有七葬

新登縣界沈崧誌其墓

任臣案研北禱志謝皇父常至新城聞故老言羅隱給事冢在

縣界徐村之水陂冢碣猶存梁開平四年沈崧志又錢塘縣志云隱墓在定山鄉居山里紹興府志云隱寓居蕭山卒墓在許賢鄉一統志云隱墓在涇縣東七十里江西通志曰羅隱墳在樂安縣羅家潭所說不同未詳

是孰隱為文章多氣力而性傲睨嘗值韋貽範于舟次素

昧生平隱直呼舟子曰是何朝官我脚間夾筆可敵得

數輩貽範慚恨卒以此沮之又作詩文及謔語常涉刺

譏顧雲依淮南高駢隱譏之夏飲于海風亭雲曰青蠅
彼扇扇離席隱遽曰白澤遭釘釘在門隱在浙幕沈

荻得新榜示隱隱題其末曰霸陵老將無功業猶憶當

時夜獵歸入昭宗欲以甲科處隱有大臣舉隱華清宮

詩云也知道德勝堯舜爭有吳越掌記集三卷江南甲

泰楊妃解笑何其事遂寢

乙集十卷江東後集三卷湘南應用三卷靈璧子兩同

書十篇又有讒書五卷淮海寓言七卷多散失不傳先

是隱適魏謁鄴王羅紹威將入境先寓書叙家世以紹
威為從子行莫府吏皆怒曰隱一布衣而姪視大王可
乎紹威素重士且曰隱名振天下王公大人多為所薄
今惠然肯顧得為從子幸矣遂擁旆郊迎執禮甚恭隱
亦不讓比行贈錢百萬仍以書抵武肅王稱為季父

紹威

喜學隱詩號其
文曰偷江東集

而青州王師範亦嘗遣信賫禮幣求詩

及得隱詩大喜又令狐滈登進士隱賀以短章滈父綯
曰吾不喜兒得第喜得羅公一篇耳其取重當世有如

此唐末時新城鼉江恒有二氣亘江上晝夜不滅至隱
與杜建徽生二氣不復見識者以為文武秀氣焉子塞
翁官鎮海節度推官善繪羊超絕妙于一時

論曰語云士用則為虎不用則為鼠豈不信哉方隱屢
躋進士第徧歷諸州馳驅擾攘之中億矣及遭逢霸王
文采爛然聲施後世可不謂得時而駕邪雖然以彼義
形于色勸興兵伐無道梁貌貶強藩畜以從子大義侃
侃又寧獨以文士見哉

顧全武

杜稜

成及

馬綽

阮結

顧全武餘姚人也從武肅王為親校與杜稜阮結等常侍左右久之授武勇都知兵馬使董昌作亂昌將徐淑會淮南將魏約共圍嘉興全武將兵往救破烏墩光福二寨有功還守西陵以遏淮南安仁義之師已而敗昌將湯璩于石城復攻餘杭擒昌將徐章又降袁邠圍越州昌嬰城自守遂去帝號會蘇州陷成及為淮南所鹵

武肅王急徵全武趣西陵使備淮南全武曰越州賊之
根本奈何垂克而棄之請先取越後復姑蘇為便而是
時昌有兄子真者驍勇善戰全武攻之逾年不能下真
與其裨將刺羽有隙羽譖殺真昌兵乃敗全武執昌殺
之是役也先登陷陣設伏捕鹵圍城降敵全武之功為
多明年全武復由海道至嘉興破淮南十八營鹵淮南
將魏約頃之拔松江破無錫連取常熟華亭逐海寇王
騰

時騰據華亭

已又攻蘇州走臺濛敗周本所向無敵遂克

蘇州陷崑山降其將秦裴裴之守崑山也全武帥萬人
圍之裴屢出戰使弱者披甲執矛壯者執弓弩全武每
為之却至是勢迫降武肅王命設千人饌為餉裴出羸
兵不滿百人王怒曰軍弱如此何敢久拒對曰裴義不
負楊公今力屈而降非心降也全武力勸王宥之時人
頗稱其長厚天復元年有傳武肅王為盜所殺吳王遣
李神福帥師取杭州全武列八寨以待而神福與全武
相持久縱杭俘使出入卧内陽謂諸將曰杭兵尚強我

師且當夜還抗俘走告全武全武不意其詐也薄暮神福故令羸兵先行而使都將呂師造伏兵于青山下神福親殿其後全武素輕神福引兵追之伏發為神福所擒王聞之驚泣曰喪我良將會明年吳以秦裴故遣全武來易全武由是得歸國而武勇都之變作初徐綰叛王使全武備東府全武曰東府不足慮可慮者淮南耳綰急必召淮兵至患不細矣楊公大丈夫今以難告必聞我王以為然全武曰獨行事不必濟擇諸公子可與

俱行者王曰吾常欲以傳臻昏楊女迺使隨全武如廣陵紹果召田頔于宣州全武等至廣陵吳王以女妻傳臻趣徵頔頔怏怏而還是時徵全武力為聯姻楊氏抗越幾殆未幾陳詢叛睦州淮南遣陶雅助兵全武時為指揮使復與王球共禦雅失利居數年卒先是全武建宅越地畢工之際梁棟戶牖皆出水竟不得入居而死時人謂之宅泣或言全武少落魄無行常髡髮為沙門故左右以僧為諱當園崑山日全武檄秦裴降裴封函

納款全武大喜亟召諸將發函則佛經一卷全武大慙
曰裴不憂死乃戲我乎由是攻益急引水灌城而城遂
破

杜稜字騰雲新城人父仲明不仕累贈水部員外郎

方廙

杜將軍廟記曰杜自漢御史大夫延年起家迄唐盾為
永嘉太守五子分適他郡少子朋居錢塘遂為錢塘人
後有仲明仕水部
員外郎實生稜當唐乾符廣明間盜賊充斥寇掠兩

浙無虛日杭州練諸縣鄉兵討之稜時為東安都將更
號武安營與董昌徐及凌文舉等稱杭州八都推昌為

長而以武肅王副之武肅王功業日盛僖宗拜為杭州
刺史稜謂諸子曰吾每責人不過十罰則為之傷心觀
錢公每有斬決皆談笑自若成大事者必此人也遂傾
心事之潤州牙將劉浩逐其帥周寶寶奔常州浩推薛
朗為帥武肅王命稜與成及阮結討之敗其將丁重德
趙君度一作李君雅取常州奉寶歸抗奏除稜常州制置使
稜屬其兵于諸子建思治內建徽禦外建孚則往來經
度其間皆以武藝稱焉龍紀元年宣州將田頔李友

一作

有來攻鑿穿地道甲兵俱從土中夜入稜寢室執稜于
臥榻而去已而縱之歸大順二年武肅王以淮南數侵
邊境令稜築東安城自固稜相險易度資用因山為城
環地為池越十月而訖事昭宗以武肅王領鎮海節度
使即以稜充副使乾寧二年武肅王奉命討董昌昌乞
師淮南淮南將田頔安仁義率眾攻東安稜憑城自守
會乏水穿井百尺不得泉稜默禱于神泉即湧地出是
時頔與仁義號淮南勇將樓櫓翔空矢石交迸稜隨機

拒敵日斃淮南兵于城下者無算淮南兵百端攻之不可下由是紫溪保城建寧靖江四鎮皆聚保東安民懷其恩因目其井曰杜公井明年董昌伏誅改威勝軍曰鎮東唐拜武肅王鎮海鎮東節度使進稜兩浙諸軍都指揮使行軍司馬

一云許在鄉建立生祠

又明年安仁義來攻婺

州武肅王命稜將兵救之仁義移兵攻睦州竟不克稜

累官潤州刺史卒

墓在新城縣北三里官塘之原

命立祠新城縣西

今名

杜將軍廟後以子建徽貴贈太師初孫儒死士卒多奔浙西

武肅王愛其驍悍以為中軍號武勇都校諫曰狼子野心它日必為患請以士人代之王不聽及徐綰之亂命使祭稜以旌其先見建思建孚建徽後悉以功名顯建徽別有傳

成及字弘濟錢塘人祖克評唐嘉王府長史父貞唐國子博士及性篤厚為鄉里所重乾符中代聞人宇隸八都之一遂以富陽鎮稱靜

一作靖

江都將劉漢宏作亂從

武肅王討平有功俄武肅王拜團練使隨以及為副使

及與武肅王同事攻討密謀多出于及及因為子仁瑋娶王女情好甚篤會北關鎮將劉孟安有貳心即席奮劍犯王及舉繩牀蔽之得免偏將盛造旋執孟安誅死以功奏遷散騎常侍復為靜江鎮將光啟中奉命征薛朗時常州刺史丁從實具牛酒以犒浙師仍遺美女于諸將及取而斬之餘悉不納遂克常州尋平潤州奏授兵部尚書充本州防禦使龍紀二年代阮結為潤州制置使累遷檢校司空乾寧三年改蘇州刺史是時淮南

兵圍蘇州常熟鎮使陸郢巡檢郭用

一作周

與其黨趙邯

以城應弘農王揚行密邯手办其母妻子而盟城陷及倉卒被鹵弘農王聞及家所蓄惟圖書藥物大加欣賞歸署行軍司馬及拜且泣曰及百口在錢公所失蘇州不能死敢求富貴乎願以一身易百口之命引佩刀欲自殺弘農王遽執其手止之館于府舍明年淮南將士魏約等為浙所獲弘農王計留及無益遣及歸以易約為辭武肅王許之除及鎮海軍節度副使奏授司徒至

太傅武勇都之變也先是軍中以治溝洫過勞有怨言
及亟請罷役不聽已而亂驟作武肅王自衣錦軍回不
得入及假建王旗鼓高牙大蓋擁節先驅與徐綰等戰
而王得微服進城部署軍卒大亂畧平及功居多焉武
肅王性嚴急每有檢發必亟加斬以或及至雖盛怒輒
為之霽容其寵遇如此累陞贊正安國功臣保大彰義
等軍節度使開府儀同三司檢校太尉贈太師兼侍中
卒年六十七及天寶初避梁廟諱改姓為咸

梁太祖
烈祖名

子孫時仍稱本姓

馬綽餘杭人也為人惇直居恒以忠節自許初與武肅王俱事董昌昌常使王閱部伍亡其名籍王歷唱之存亡健悴都無所失綽密語王曰老子素猜忌駭公強記當必相圖乃以白牋數番陽授王若代軍籍者王感其意深德之因以從妹歸綽

九國志云綽以女弟妻錄錄復為元璿取綽女今從備史

註綽尋隨昌於越州昌僭號綽棄家來奔奏授諸城都指揮使徐許之亂綽有發懸門功武肅王隨命文穆王

納綽女是為恭穆夫人綽累職鎮東軍節度副使兩浙

行軍司馬睦州刺史已又進雄武軍節度使

薛史作秦州節度使

即雄武軍也

檢校太傅同平章事天寶十一年加檢校太尉

久之卒年七十一

阮結字韜文錢塘人唐末杭州建八都結亦與為副焉
結出入武肅王左右號親校中和二年以征劉漢宏功
奏授散騎常侍光啟三年征常州又平潤州累加戶部
書四年充潤州制置使加刑部尚書初徐約黨三千

餘人來降結撫之失所因散香甘露寺輒為亂投結于江遂成疾而卒年四十六

論曰武肅以驍勇之資崛起草間羣策羣力一時景附若全武及者洵能擇其主已稜子濟美奕世綽女作配王家視豐沛故人膺寵為獨厚結遭悍卒之變未竟其用忠誠靡貳亦詎出諸公下焉

杜建徽

鮑君福

曹圭

屠瓌智

杜建徽字延光稜之季子也彊勇不與諸昆類常在山

墅私署軍州押牙紀于棟鄉里見焉驚聞稜稜加督責
建徽對曰大丈夫何止一軍事押牙邪始從軍無事人
志及稜歸武肅王乃以父命盡心于王累從征伐所至
輒立功軍中謂之虎子軋寧初隨討董昌被箭中左臂
建徽猶能軍無退志無何稜遷常州制置使建徽代為
武安都將會稜為淮南鹵及歸見建徽軍中嚴整無改
其制甚稱之稜將歿散家財與衆子惟授建徽一笏
一作曰此吾歷諸任所秉者獨汝能傳之故乞汝徐綰許

再思之亂建徽時為武安都指揮使自新城入援賊聚木將焚北門建徽悉鉤取其木燬焉賊為氣奪頃之武肅王由衣錦城歸遣建徽及馬綽王榮等分屯諸門或有勸王渡江保越州者建徽按劍叱之曰事苟不濟同死于此豈可復東渡售命于賊乎王竒其言而止天復三年睦州刺史陳詢叛詢與建徽兒女姻也王頗疑其有它志密命馬綽伺建徽意建徽曰陳氏負恩背義自貽覆敗建徽既為姻婭誼當見疑然累書敦諭皇天后

土實鑒臨之惟拔城獲書庶明此心耳已而詢親吏來
奔得建徽抵詢書皆責以大義無逆辭乃知建徽長者
王宿疑頓解賜錢一百萬緡建徽兄建思與建徽不相
能至是告變言建徽私蓄兵仗亂且不測武肅王急命
親校索之建徽方具食不顧聽使者入卧内絕無所得
王以是益加親重遷浙東營田副使常州刺史行軍司
馬為構第城南親與規畫天寶八年送王子傳珎進京
師尚梁壽春公主未幾歸進涇源節度使十六年王建

吳越國如天子制以建徽為左丞相每朝會王必以目
送之曰今日忝竊一方杜丞相力也建徽歷仕四王累
官國子祭酒涇源昭化諸軍節度使丞相兼中書令封
鄖國公乾祐三年卒年八十有八贈太師謚曰威烈建
徽子孫兄弟朱紫盈門而性尚儉素導從不過數人財
物多散鄉里親族忠獻王時孫昭達為內牙都監使盛
治第宅強建徽觀之曰乳臭子不諳事乃爾俄昭達果
以罪誅少驍悍臨敵輒單衣入陣不介馬而馳從王弟

錄援姑蘇與敵遇河梁斷處鞭馬徑度及岸馬斃而建
徽自若也因瘞其馬號曰馬冢至老不廢騎射常擊毬
廣場興酣有宿中箭鏃自臂中飛出時人壯之

鮑君福字慶臣唐太子少保防之裔也後遷越遂為餘
姚人祖興父燦俱不仕君福少羈貧為人沉默少言純
厚有膽畧餘姚有井面廣丈餘每恣卧其上無惧色鄉
黨異之及從軍以驍果稱初隸劉漢宏部為牙將曹娥
塙之役來歸武肅王武肅王使領一軍號向明都君福

常側兜牟臂弓注束矢馬上輪雙劍如飛出入陣中望
之若流電人皆呼曰鮑閑累積戰功為衢州應援指揮
使屬刺史陳璋叛淮南人入其境脅君福為郡職君福
不納武肅王慮其遇害密賜帛書令姑受命以緩旦夕
死終堅拒不肯從伺守者李元嗣醉遂馳歸尋授衢州
刺史吳將周本守信州屢侵信安境君福時時率數騎
往追之本即遁去天寶十一年王子傳球攻信州從斬
吳將李師造擒偏將馮敏等功為諸軍之冠文穆王領

清海節度使辟為副使及將罷郡武肅王勞曰比在任
戰敵而已未足以盡副使才因復命之任君福在衢州
凡一十二年後遷湖州累職鎮海軍節度副使浙西行
營司馬奏授登州刺史保大保順等軍節度使檢校太
尉同平章事兼侍中天福五年卒年七十七贈開府儀
同三司謚忠壯君福有賜田在錢塘今所為鮑家田是
也

田近
玉泉

子脩讓別有傳

曹圭本歙州人父信知嘉興監事尋由歙徙抗為臨平

鎮將八都建時信因保嘉興東界遂家臨平焉圭之將
生也信夢一丈夫謂曰我當為爾子有二千石已而生
圭圭少負膽氣唐末事武肅王為嘉興都將淮南兵圍
嘉興圭與族人師魯環城固守淮人望氣者曰此雖孤
城中有貴人未可圖也是時戎馬充斥晝夜戒嚴圭日
與師魯登城樓張樂豪飲矢石交下處之晏如未幾圍
解圭以功超遷蘇州制置使天寶初淮南兵復圍姑蘇
會正月望夜圭及師魯等盛陳燒燈之席凡賊俘頌繫

者悉縱觀之以示從容已而圍亦解久之以浙西營田副使檢校太傅終于蘇州師魯形短而多智武肅王常稱曰今晏嬰也人因號為曹晏嬰竟居鎮而卒圭子仲達有傳

屠瓌智字寶光其先河東人晉將軍擊之後也祖某避地澱川遂為海鹽人母顧夢抱璧有光而生故名瓌智瓌智姿貌偉傑夙有勇畧更善屬文唐時累舉不第武肅王初起鄉兵逐黃巢瓌智仗劍相從數數以籌畫進

得叅莫府謀議董昌僭號瓌智首勸討賊昌誅以功授
指揮使乾寧四年同顧全武副王弟鎮自海道救嘉興
生擒賊將楊勝頌金等二十餘人計功遙領常州刺史
明年春再遷越州指揮使光化元年衢州刺史陳岌叛
瓌智又同全武等討平之三年調守湖州徐綰許再思
之亂也刺史高彥遣子渭與瓌智入援渭曰今日不利
彥曰赴君父之難何以吉辰為瓌智排案起曰違主命
不忠畏縮不前無勇死忠死勇丈夫分也偕渭直抵靈

隱山賊壘敵勢方張甚合圍數匝二人自朝至日晡轉
戰數里身創百處時或奮刀一呼手搏賊魁數人即馬
上刃之矢盡援絕以空拳拒敵伏發竟同為所害時年
五十有二武肅王閔其忠俞以衣冠招魂而葬

墓碑云
葬開元

府海監縣南三十六里澠川之
青山德政鄉歸仁里開化村

天寶五年特贈忠義軍

匡國功臣武康節度使銀青光祿大夫檢校尚書右僕
射開府儀同三司上柱國子龍驤澌水鎮遏使昱

闕

節度使晟湖州判官

墓碑云 璩智娶錢氏子龍驤娶
聞人氏昱娶鄭良女晟娶許氏

智常有咏志詩曰輕身都是義狗主始為忠至是遂符

其識

丞相皮光業屠將軍墓誌銘曰河山鎮瑞帶砥鍾英仗步奮跡赫聲濯靈么屏叛授九首馮陵磨牙

王國吮血蒼生公怒庭發捷代擊腐矢屠猱猱以身狗君功高盟府猷壯干城光啟前烈垂裕後昆忠孝續襲

勲土褒旌連崗崇定妥綏義魂桓趙世選焜耀貞珉

論曰鄖國出入將相允文允武儋圭錫爵獲躋遐年非

倖也君福善戰圭善守有古名將風瓌智奮不顧生卒

以身殉至今猶稱忠烈不衰焉

十國春秋卷八十四



總校官庶吉士臣張能照

校對官檢討臣王鍾健

謄錄貢生臣蘇曰柄

欽定四庫全書薈要

史部

十國春秋卷八十

九五
九

詳校官員外郎臣楊世綸



十國春秋卷八十五

檢討吳任臣撰

吳越九

陳列傳

高彥

子渭

朱行先

黃晟

司馬福

孫琰

吳敬忠

滕彥休

高彥海鹽人初與同縣沈夏受武肅王意密謀誅都將徐及其首歸王前後從征多顯功擢海昌鎮將會湖

州刺史李繼徽棄郡奔淮南彥隨王親巡其地王由是
雅屬意彥題詩嬰蘭堂壁云須將一片地付與有心人
及去語彥曰我以此州授汝矣汝宜善撫之奏遷湖州
制置使旋升本州刺史遙領費州加檢校司空渤海公
彥性淳厚居湖十一載政尚寬簡民頗便之天祐三年
冬與道場山僧如訥訣別而卒如訥口能容拳手過膝
彥常以師禮事之

渭彥長子也初從彥于湖州武肅王巡衣錦城會有徐

許之亂焚掠郭郭將及內城彥聞變亟遣渭赴難渭遂率所部徑趨靈隱山伏發遇害後淮南檻送徐綰歸王命剖心祭渭

朱行先字蘊之海鹽人也燕頷虎頭猿臂善射時人稱曰小由基起家建寧都將事湖州刺史高彥屢立戰功武肅王擢為節度左押牙親衛第三都指揮使及彥子澧敗率衆自歸賜號協力勤王功臣再加佐正匡國功臣晉秩檢校尚書右僕射御史尋為靜海鎮遏使在鎮

恩威並行甚著聲譽凡十有五年寶大元年七月卒于
官年七十二贈銀青光祿大夫上柱國弟三人行存行
勤行忠子從訓智紹不仕元晟元杲俱節度正散將元
昇節度卜將元寶元勝元贊凡八人

墓碑云行先要汝
南周氏隴西彭氏

清河張氏
三夫人

黃晟明州鄞人也初應募于望海鎮鎮中立表以魁梧
者為入格晟短小貌寢陋不中選乃隸鎮都虞候林膺
已而潛還本鄉募衆據平嘉埭時權知州楊傑召署為

平嘉浦將有衆千餘人先是劉漢宏以台州賊婁文知

明州事文為侯所敗其黨杜宗自寧海鎮率鄉民屯奉

化晟自平嘉埭以所部兵擊之鹵獲甚衆居頃之餘姚

鎮將相嘉侵越州董昌禦之不利明州刺史鍾季文檄

晟統兵攻嘉殺之昌以平賊功奏授晟左散騎常侍充

浙東道東西副指揮使季文卒晟遂為本州刺史

九國志云

會刺史鍾文季卒遂據其

邵今從吳越備史作季文晟頗尚禮士辟前進士陳鼎

牟紹素為賓客江東儒學多依之

號其里曰

昌僭號改

元晟亦移書規諭及武肅王舉師晟率衆應之在任十八年卒時天寶二年也遺疏不請子為嗣凡府庫所蓄必題曰送使其忠順如此

司馬福蘇州人始隸武肅王水軍為遊奕都虞候天寶二年淮人圍蘇州內外阻絕王濟師莫知音問福沒水中三日進內得報復出而援兵遂與城中弓矢相應是役也淮人為水柵環城繫鈴于網沈水底斷潛行者福善泗水先以巨竹觸網淮人聞鈴聲舉網福乃過入城

中其出也亦然衆莫不以為神福故多髯至是截鬚為
卜者敵人卒不能識進官都指揮使武肅王城吳江置
軍鎮命福主之遂老於其職

孫琰臨海人驍勇有智時人謂之孫百計積功至牙將
守蘇州天寶二年淮南將周本呂師造圍蘇州攻法凡
百出不可窮最後推洞屋攻城若帡幪然琰隨機應敵
置輪於竿首垂絙投錐以揭之攻者盡露及礮至則張
網以拒礮遇網輒止竟無所施淮南兵遂夜遁

吳敬忠於潛人也從武肅王以八都兵討劉漢宏有功
及王出師助淮南討田頔敬忠先登陷陣卒奏捷而歸
梁太祖既封王吳越兩國敬忠亦以積功授正國功臣
浙西營田副使累加太師兄順以功擢鎮海軍保城都
指揮使檢校司空弟訢官太傅子八人仕本國皆貴顯
杭州府志吳敬忠墓在於潛縣南五里豐國後鄉東村

滕彥休

闕

人幼岐嶷有辨才天寶八年出使于契丹

大得契丹心明年復報聘會契丹兵攻梁蔚州敵樓無

故自壞衆軍乘之不踰時而破契丹主引彥休環城以
視因賜彥休名曰述呂十三年五月武肅王復令彥休
使契丹兼饋犀角珊瑚諸物契丹主大悅授彥休官遣
還彥休往反契丹者數四泐海溯河跋涉險阻輯睦鄰
封為功居多焉

論曰高彥遣子赴難志存君父其公爾忘私者與朱行
先束身歸正比匪靡傷福琰敬忠躬在行間智勇俱奮
庶于王臣無媿焉黃晟乃心恭順滕彥休不辱君命咸

有令聞善夫

吳公約

章魯封

饒景

薛居正

謝鶚

鍾匡範

陳長官

童顗

鍾廷翰

楊巖

許俊

孫陟

聞人凝

張瑗

劉甫

蔣勛

王畊

吳公約字處仁餘杭人也黃巢之亂杭州八都既建已
又派而析者號十三都公約其一也公約初負膽略為

縣豪會朱直起兵應募西討以功署西桂鎮遏使未幾
從董昌禦巢于西鄙加御史中丞奏置都額改硤石為
訓兵之所摧鋒破銳日有聲稱武肅王破越州公約驍
果先登兵罷拜千牛衛將軍肅政_闕長項之劉浩平錄
功擢散騎常侍已而徐約陷蘇州武肅王委公約專征
特授北面諸軍行營招討使明年春克蘇州竟讓軍功
以本都歸王益嘉其忠授義和鎮遏使兼本軍水陸都
遊奕使居無何淮人侵擾公約扞禦疆域屢挫敵鋒遷

工部尚書俄改刑戶二部

杭州府志又云遷左執法

乾寧四年卒羅

隱銘其墓

餘杭志有吳公約尚書碑

公約澹于嗜欲所得軍實率分

資戲下以為常為將數十年家無長物出則督勵將士

入則訓誨子弟稱一時賢將云

章魯封

一作魯風

桐廬人也頻舉進士不第有雋才少與羅

隱齊名武肅王既破董昌辟魯封為表奏孔目官魯封

拒不受武肅王命吏笞之已而勉就職累官蘇州刺史

著章子三卷行于世

饒景

一作京

青州淄水人唐廣明時杭州建八都景為唐

山都將天寶時事武肅王為鎮海軍紫溪鎮遏使累有
防禦功十四年卒王奏聞于梁贈太保遂葬金昌縣之
金山鄉後墓木皆高百尺合抱有犯之者輒為異物所
怖即止

薛居正錢唐人仕武肅王官太尉卒謚貞顯葬于靈石

山之麓冢前常有紫藤遍繞三峯

案居正三世孫昂仕宋為尚書左丞人謂

冢前紫藤之瑞應

謝鶚南康人舉唐進士兒時夢浴溪中有人以珠一器遺之曰吞此則明悟矣鶚吞細珠六十餘顆及長善為詩有文名仕武肅王為關寶大時朱行先勤王

事而歿鶚為撰墓誌銘文章雅贍一時推許銘曰挺生英特邈爾奇形素蘊豹略能精武經戈鋌再舉氛祲廓清從茲勇冠大播家聲盛績既彰威名遂振靜守謙敬動知逆順惟此侯王賞其忠信不有殊功疇遷劇鎮匡吳志大佐越功全一人注意百辟推賢方務剖竹宜分

重權孰謂梁木俄隨逝川生作忠臣沒留遺冊眷彼令
嗣恭承帝澤丹旒斯引玄宮已闢萬歲千秋芳塵永隔
鍾匡範唐鎮南節度使傳第二十子也鍾氏既滅匡範
同母來歸甚為武肅王所禮時匡範獻王雲鶴通天離
水犀帶一圍及玉盃一事玉盃常覆五雀雛于內熾炭
久然比啓視而雀雛已飛去是一異也武肅王受盃反
帶贈錢二萬緡匡範因攜帶往碧波亭命許彥方繫帶
行水中水開七尺許遂至瑞石山登岸國人大為驚異

或云帶故唐明皇御玩遺在西川川客獻與鍾傳傳常寶之

陳長官事武肅王為寧海縣令會王命增州縣賦稅長官上書極諫王大怒逮之獄長官以死爭之得免寧海故稱劇縣租稅視諸邑為獨輕者皆其力也至今猶廟祀焉

童顏青溪人也素有勇力武肅王時多著勤勞拜西扇都巖將王賜誥曰制左軍同十將充西扇都巖將顏早

係轅門久居巖界星霜屢換警察無欺寡人自罷丕圖
廣施慶澤睦茲勤瘁宜示陟遷克固前修更期後獎可
銀青光祿大夫檢校太子賓客兼監察御史上柱國充
十將餘如故及卒葬于青溪仁壽鄉

又青溪王延壽叔
唐太尉克儉與武

肅同事征伐延
壽官吳越主簿

鍾廷翰

關

人流寓湖州素有賢名武肅王命攝安吉

主簿牒曰廷翰儒素修身早升官緒寓居雪水累歷星
霜克循廉謹之規備顯溫恭之道今者願求錄用特議

掄材安吉屬城印曹闕吏俾期差攝勉効公方倘聞佐
理之能豈忭超昇之獎後不知所終

楊巖弘農人也父承休官唐刑部員外郎天祐時副給
事中鄭祁冊封武肅王為吳王會淮南道阻不克歸遂
留杭州初承休之行也挈巖與俱巖歷仕武肅王父子
累官至丞相子鄩以任子歷官尚書職方員外郎鄩子
蟪蚤卒蟪子侃年十歲能作雪賦忠懿王入宋鄩率侃
以其族隨行僑居宋州

許俊鹽官人年十八從武肅王以驍勇稱屢積戰功官至節度使都押牙兼御史中丞寶正三年卒

孫陟新城人武肅王時歷官杭州刺史加檢校尚書已而防禦常州調兵督戰歿于陣以卹禮歸葬于邑之太

平鄉贈銀青光祿大夫上柱國

又慈溪人馮叔和仕吳越官至尚書附記于此

聞人凝天寶十六年為富春令重建縣治有興廢功

張瑗事武肅王累官至司空出鎮華亭普照寺僧某者不識物情以蔬食進焉瑗領之密啓王于寺後鑿三河

訖為運道而寺用不寧

劉甫其先泉州人徙居閩縣

闕

王時甫舍閩來仕遂

不復還鄉閭稱其廉孝子若虛亦知名于宋

蔣勛晉吳郡太守樞之後也唐末避地婺州之東陽仕

闕

王為金紫光祿大夫檢校司空兼御史大夫遂家

焉

王畊

闕

人善画尤精牡丹遂為一時丹青之冠不知

所終

沈夏

沈行思

沈夏海鹽人初武肅王同董昌討劉漢宏于越州鹽官都將徐及遣夏與高彥率本部來會師王見之甚悅延入卧內謂曰我東征師旅已衆渡江之役無勞爾輩但徐及素強梁終非我所蓄以我東渡必為後患汝為我殺之當以郡牧相報吾非誨人為逆惟是境土苦于干戈不仁者宜盡驅除用息生聚耳夏等再拜聽命王厚遣歸既歸告及曰董公與錢公以兵討賊聞將軍遣所

部見助喜動顏色然時時以東北為慮設有竊發復勞
後顧夏等實托將軍以為後據及有軍師某者頗疑夏
勸及為備不聽夏遂與其下謀殺及及死其衆遂分夏
性兇暴不即來歸乃以所得衆七千餘人聚臨平山下
擇幼弱者盡殲之遂得三千人往嘉興劫吳公約入海
為亂未幾縱公約歸始復奔于杭武肅王優容之累從
征伐奏授武勝軍都指揮使遙領晏州刺史加檢校司
空至任輒以殺僇為事左右不任用者即加屠害王頗

惡其所為夏復構私第于北郭制度與公府埒長子有過手办之王以其噬子滋不悅出為婺州刺史會淮南將陶雅侵其境王不時救項之東陽陷夏遂被執尋遇害

沈行思一名行瑜

闕

人積功為湖州巡校將初高澧

出奔行思與都將盛師友同有閉城功武肅王巡湖州乃命師友從行而行思頗有牧守之望謂同職陳環曰盛君來豈不佩印綬歸邪不然我後安處君為我裁之

時環已得密旨俾遣行思歸國乃紹之曰二人功本無
優劣且王情尚未可測宜亟詣府城面較功績以決其
可否行思遂來覲王王亦優待之環隨送行思之家至
行思始悟其詐深銜環遂懷觖望王將及國城行思與
環俱候北郊行思自取巨槌擊殺環奔王舟以陳其前
功復言師友與環毀間之狀是時師友方從亟引以相
證行思輒奪威鎗刺師友左右遂擒之王曰吾早以汝
強梁故不欲任汝繼念閉城功將牧以他郡今所為若

此疇能容之命斬于龍丘山許其家收葬而師友竟擢
婺州刺史

論曰吳越開國諸將隸麾下者多恂恂和雅慕祭遵羊
祜之遺風沈夏獨恣睢嗜殺戮及愛子洵天資刻薄人
也行思覬覦專城鞅鞅自失戕害同官自取罪戾倘所
云匹夫之勇非邪

十國春秋卷八十五

十國春秋卷八十六

檢討吳任臣撰

吳越十

列傳

沈崧

皮光業

曹仲達

林鼎

仰仁詮

沈崧字吉甫閩人也祖輅唐大理評事賜緋父超福州長溪縣令崧初生時有大蛇墜榻前引首注視久而方

去既七日將浴忽風雨震壞浴盤人咸異之乾寧二年
刑部尚書崔凝知貢舉登進士第者二十五人崧與焉
已而昭宗御武德殿命翰林學士陸辰秘書監馮偃覆

試凡落十人是日崧再入選

閩書云崧乾寧三年丙辰狀元○羅江東外紀云崧

與羅隱從事浙江幕下主公出伎衆稱殊麗便是姮娥
崧曰姮娥甚陋安可及主公驚曰書記識姮娥否曰崧
兩度到月宮何為不尋歸閩道由淮甸淮帥辟之不就
識崧蓋以是警隱云

遂經杭州武肅王留為鎮海軍掌書記除浙西營田副
使奏授秘書監檢校兵部尚書右僕射凡書檄表奏多

崧所出後唐莊宗即位改元同光武肅王問其祚修短
崧曰觀此號為國不成止一口耳文穆王立雅好儒學
置擇能院選吳中文士錄用之命崧領其職國建拜崧
丞相天福三年二月卒年七十六謚曰文獻有集二十

卷

按仁和縣志縣東二十
五里沈家塘即崧宅

皮光業字文通世為襄陽竟陵人父曰休有盛名唐末
為蘇州軍事判官太常博士遂家焉光業生于姑蘇十
歲能屬文及長以所業謁武肅王與沈崧林鼎同辟莫

府累署浙西節度推官賜緋天寶九年王欲通誠于梁而難其人且中隔淮南輒統道為苦于是以光業為才使自建汀逾虔郴越潭岳荆南入貢梁均王大喜加王天下兵馬大元帥開府置官屬特賜光業進士及第仍賜秘書郎授右補闕內供奉賜金紫未幾淮人來求好王以光業報聘及還贈錢三百萬復禁其出且曰可以市易光業曰我使介也豈賈豎也乃委置而去淮人亟載隨之尋兼兩浙觀察使文穆王嗣立命知東府事天

福二年國建拜光業丞相與曹仲達沈崧同日受命凡
教令儀注多所考定光業美容儀善談論見者或以為
神仙中人性嗜茗常作詩以茗為苦口師國中多傳其
癖八年二月丙辰卒年六十七謚曰貞敬所撰皮氏見
聞錄十三卷行世初光業微時夢亭上偶人皆列拜覺
而自負又旅遊會稽有神降于里巷光業往視之神輒
不語及去衆詰之曰皮秀才此土地主我小神不當遽
見梁選王子傳珎為駙馬都尉光業奉命如京師及歸

經靖海山陰令滕文規故光業舅也日暝見有黃衣吏
報曰皮補闕今已及靖海俄失所在其異徵多此類弟
光鄰官温州刺史子璨或作文
燦非官元帥府判官著有鹿
門家鈔詩咏三世皆以文雄江東識者榮之

曹仲達圭之子也本名弘達後避孝獻世子諱更今名
仲達生于臨平當母坐蓐時室有紫光家人咸異之稍
長圭欲其習勞品膳悉與僕隸等即嚴冬尚未挾纊又
日令運甕以苦筋骨尋為鎮東軍押牙圭在蘇州日常

乞婚于睦州陳詢至是遣仲達親迎卜之曰陳非耦也
當聘他族以致榮顯已而道過錢塘武肅王奇其貌遂
以王妹儷焉累授台處二州刺史文穆王立命仲達權
知政事及建國拜丞相與沈崧皮光業同秉國鈞忠獻
王即王位仲達復攝行軍府事時大賚諸軍軍中言賜
予不均輒大譁舉仗不受賜諸將不復能制仲達親出
階諭之辭旨曉暢皆釋仗而拜仲達性仁厚好施食不
兼味文穆王雅重之每呼丞相而不名卒年六十二謚

曰安成

林鼎字渙文侯官人父無隱有詩名流寓明州刺史黃晟頗好禮士無隱依之鼎生于明州之大隱村及長謁武肅王王以為觀察押牙尋辟文穆王莫府文穆王以其才行累薦不見用一日復密薦之武肅王曰鼎骨法非常真輔相器然我不驟貴者欲汝貴之庶盡心于汝也文穆王龍位署鎮海軍掌書記節度判官鼎性謹正而強記能書得歐虞筆法比中年讀書必達曙所聚圖

籍悉手鈔數過即殘編斷簡亦較讎補綴無所厭倦國
建命掌教令尋拜丞相凡政事有不逮者鼎必極言罔
忌諱天福中建州之後鼎指陳天文人事累疏切諫王
不用鼎言卒無成功人多鼎有先見云開運元年正月
卒年五十四謚曰貞獻有吳江應用集二十卷

仰仁諡湖州人也事文穆王為牙將以練達稱王弟元
珣不法文穆王命仁諡詣明州召之左右慮元珣難制
勸衷甲以往仁諡竟常服造聽事偕元珣還杭州神氣

優暇畧無周張時皆服其度量久之建州刺史王延政
與閩主相攻乞師于抗仁詮奉命往救師久不旋隨為
延政所敗及忠獻王立納仁詮女為元妃累官寧國軍
節度使同叅相府事未幾卒弟仁謙隨忠懿王歸宋授
太子舍人出知永嘉縣

論曰崧玉質金相黃中通理光業文章爾雅黼黻邦家
仲達鼎鬻然人望遇事能斷聯鑣競爽出入端揆彬彬
乎皆華國之選也仁詮雅有幹略雖失利南征而蓋愆

末路亦過不掩功者與

陸仁章

章德安

郭師從

唐仁恭

陸仁章睦州人也少微賤有大志以窮因為武肅王園卒時人未之知也武肅王常遊府園見仁章樹執有智而志之及淮南兵圍孫瑱于蘇州繞城三匝無路可通武肅王使仁章設計入城果得瑱報而出由是益加稱賞以諸孫輩畜之累遷兩府軍糧都監使俄轉內牙指揮使及武肅王薨文穆王已承制統軍府事矣方與兄

弟同幄行喪仁章進曰令公嗣先王霸業將吏旦暮趨謁當與諸公子異處乃命王者更設一幄扶文穆王居之告將吏曰自今惟謁令公禁諸公子從者無得妄入晝夜警衛未嘗休息寶正末年左右皆附文穆王仁章獨數數以事相犯至是勞之再三仁章曰先王在位仁章不知事令公今日盡節猶事先王也文穆王嘉歎久之自是仁章與指揮使劉仁杞居中用事仁章性剛仁杞好毀短人頗為衆切齒一日諸將詣府請誅二人文

穆王使從子仁俊諭曰二將事先王久吾方圖其功汝曹廼欲逞私憾殺之可乎吾為若主若當稟吾命不然當歸安國以避賢路衆懼而退遂以仁章為衢州刺史仁杞為湖州刺史仁章歷官至保大軍節度使同參相府事天福四年卒仁杞富春人

按富陽舊志天成三年縣令陸仁璋禱宋明王

廟有應請封為通聖侯仁璋與仁章豈即一人歟存以竝考

章德安處州麗水人累官至內都監文穆王寢疾時察德安忠直能斷大事欲屬以後事語之曰弘佐尚少當

擇宗人長者立之德安曰弘佐雖少羣下服其英敏願
王勿以為念王曰汝善輔之吾無憂矣已而文穆王薨
內牙指揮使戴惲者與文穆王養子弘侑比蓋弘侑食
母惲妻之私親也或言惲謀立弘侑德安秘不發喪伏
甲士于幕下殺惲廢弘侑為庶人復其孫姓而幽之居
無何上統軍使闕璠彊而橫排斥異已忠獻王不能制
德安數與之爭璠遂以計貶德安于處州右都監李文
慶亦不附璠同時貶睦州文慶故睦州人也

郭師從合肥人田頽婦弟也隸頽部下為都虞候文穆
王質宣州時頽每戰不利輒顧左右索錢郎殺之師從
與頽母多方保護得不死頽敗師從隨歸杭州武肅王
德其人署為鎮東都虞候數從文穆王破廣德征無錫
有功累遷浙西營田副使忠獻王時拜同叅相府事卒
年八十四

唐仁恭其先世自晉昌徙餘杭唐天復中有建威推官
希顏者即仁恭父也仁恭事文穆王為唐山縣令有能

聲子渭任宋官職方郎中

論曰仁章誼無徇私德安忠以事主當文穆授受之際
仁章正其始德安正其終大義斷然雖古名臣何加焉
師從保全王躬托魚服于豫且之網得膺壽考宜矣仁
恭擅良吏才撫循一邑殆所云豈弟君子民之父母者
邪

水丘昭券
薛溫

水丘昭券安國人漢有司隸校尉水丘岑者昭券蓋其

後也性沉厚知書能文章武肅王母出自水丘氏昭券以國戚故事忠獻王為內都監使唐攻福州急福州使者乞師于杭諸將多以道險遠為解昭券言救隣恤災古今通義勸王宜亟濟師與王意頗合從之忠獻王之誅程昭悅也令昭券夜率甲士千人圍其第昭券曰昭悅家臣也有罪當顯戮不宜夜興兵王以為知大體及忠遜王立忿統軍使胡進思橫甚與指揮使何承訓及昭券密謀逐之于外昭券以為進思黨盛未可猝去不

如姑容之以俟後圖王猶豫未決會承訓懼事發相及反洩其謀于進思居數日王夜宴將吏進思疑圖已輒戎服執兵帥親兵百人入見王于天冊堂曰老奴無罪何故見圖遂錮王義和院廢之并殺昭券及進侍鹿光鉉光鉉忠遜王舅也進思妻聞昭券死泣下曰它人猶可殺昭券君子也柰何殺之

薛溫錢塘人以武勇為親軍都頭天福十二年統軍使胡進思既廢忠遜王而迎忠懿王領兩軍事明年春遷

忠遜王于衣錦軍私第進思日請圖害壁說百端不止
忠懿王慮其有他變遣溫將親兵衛之且誠曰是行也
委爾保全廢王若有非常處分皆非吾意當以死扞之
進思果潛謀于溫溫拒而不許復夜使方安等二人逾
垣入忠遜王第溫帥衆救之斃安等于庭中已而進思
死忠遜王獲考終溫之力也溫累官鎮國都指揮使睦
州刺史乾德三年捨地為吉祥律寺未幾卒謚正顯一作

正獻

論曰昭券志期包荒事同裕蠱當斷不斷身殞奸邪易
言君不密則害臣臣不密則害身其水丘氏之謂乎薛
溫保衛故主矢志靡他俾二君兄弟式好克全天倫厥
功為多焉所由與終始易慮者有間矣

十國春秋卷八十六